

Hag Leiz Fungh Guh Saehndei



学雷锋 做好事

武鸣县仙湖镇中桥小学三(1)班 詹宁康

Seizcin daengz lo, fwncin saeqsisi daj gwnzmbwn menhmenh mbin roengzdaej, goliux henzdaemz did ok ngazoiq heuloeg, vadauz hix riu ndaej najhoengz lo, roegenq youq gwnz gofaex cici caca dwk ciengqgo……

Sam nyied haj hauh dwg

ngoenz geiqniemh hag Leiz Fungh. Dou cib lai vunz bae daengz gingleujyen guh saehndei: Mizmbangj dawz sauqbaet baet ranz, mizmbangj uet daiz daengq, miz mbangj gueng gaeq gueng mou, mizmbangj lwnh gojgaeq hawj daxgoeng daxbuz dingq, mizmbangj bang daxgoeng daxbuz soen ndang…… Daihgya guh ndaej nyaengqnyinyi.

Yaek dauqma seiz, daxgoeng gaem fwngz dou naeuz: “Lwngyez ndei, docih sou, ngoenzneix raeuz angq raixcaix.” “Mbouj yungh docih, baezlaeng raeuz lij ciengz-

seiz daeuj gizneix, hag Leiz Fungh guh saehndei ne.”

Gizgiz miz Leiz Fungh. Youq ndaw hagdangz raeuz, miz siujbaengzyoux diuq laemx lo, daeggo dahcej sikhaek rex hwnqdaej. Gwnz cauhcangz miz nyapnyaj, gyoengq doengzhag gungj hwet gip hwnjdaej cuengq haeuj ndaw doengjnyapnyaj. Gwnz gai miz siujyozswng h rex bouxmengz gvaq roen mbouj louz coh. Aenvih miz gij “Leiz Fungh” neix, swngghoz raeuz bienq ndaej engqgya gyaundeidei.

(指导老师:潘金妹)



Gueng Bitlwg

喂小鸭

武鸣县仙湖镇中桥小学三(1)班 韦清菁

Ranz gou ciengx bang bitlwg ndeu, mizmbangj daengx ndang hausaksak, lumj daenj geu buhhau ndeu; mizmbangj daengx ndang saek mong, lumj daenj buh sihcangh nei, caen gyaundeidei.

Moix ngoenz banhaet, gou cungj gueng bit. Mwh gyoengqde doeng yawj sae yawj, youq gwnz diegnywj doeng sip sae sip seiz, gou rox gyoengqde dungxiex lo, couh doiq gyoengqde hemq: “Bitlwg, gwn haeuxromh lo!” Hemq sat, yaengx aen bathaeux hwnjdaej youh cuengq roengzdaej.

Gyoengq bitlwg yawjraen le, bibuengq caekhaex byaij gvaqdaej, iet hoz heuhgaga. Gyoengqde sawqmwq yawjraen ndaw bat miz doxgaiq gwn, couh haengqrengz buet daej, doxciengj gwn hwnjdaej.

Gwn imq le, bitlwg couh bungbung diuq roengz ndaw daemz henz ranz bae angq dajcaemz, mizmbangj ndonj roengz ndaw raemx le, caiq ngiengx gyaiej boq raemx okdaej, lumj riengx bak nei, miz mbangj cwxcaih dwk youz bae youz dauq, lij mizmbangj cingq nyinhcaen dwk swiq gij bwn gwnz ndang.

Gou youq gwnz hamq yawj gyoengqde, song fwngz vad dwk, lumjbaenz ciheij hix dwg duzbit lo.

(指导老师:潘金妹)

Gou Gyaiez Seizcou Mbanjranz

我爱家乡的秋天

武鸣县仙湖镇中桥小学三(1)班 潘思琦

Seizcou daengz lo, mbanjranz raeuz lengqlengq gve rang mak diemz, gij vunz bouxboux angqfwdfwd, lajmbanj gingisaek hix bienq ndaej engqgya gyaundeidei.

Mbwn baenzneix sang, baenzneix lamz. Gwnzmbwn lamzsumsum haenx miz baenz duj baenz duj fwjhau mbin dwk, mizmbangj lumj yiengzlwng cingq vaiqvued gwnnywj, mizmbangj lumj duz douciq saetsaet diuqiuq guh angq.

Gwnz ndoi, mbaw raeu hoengzfwgfwg lumj mienhmienh geizhoengz; mbaw ngaenzgingq lumj benq beiz gyaundeidei. Raq rumz ndeu ci daej, mbaw faex

loenq youq gyangmbwn mbin bae mbin dauq. Ndaw gyangdoengh, doenghnaz lumj benq haij saekgim, raq rumzcou ndeu ci daej, fan hwnj baenz benq baenz benq haexlangh. Gomegmax lumj dabsau iq najmong ndeu, naj hoengzfoedfoed ngaem gyaiej roengzdaej; haeuxyangz loh gij heuj saek gim de. Ndaw suen mak, baenz roix baenz roix makit venj youq gwnz gaq, miz hoengz, aeuj, gyaemq, heu, haj saek cib yiengh, lumj aen youh aen cawngaenz ndongqliklik. Gij makgam hoengzyan haenx, sam aen guh gyoengh, haj aen guh nyup, gyaiej dep gyaiej, naj doiq naj, lumj baenz youq gizhaenx



gangj vahsebrwz, gij doxgaiq ceiq hawj vunz ngah daengz maiz rih haenx, dwg gij makleiz henjrwgrwg haenx, henjgim henjgim lumj aen youh aen daengloengz, dwggyaiez raixcaix.

Mbanjranz raeuz gingisaek seizcou geijlai gyaundeidei ha, gou gyaiez seizcou mbanjranz!

(指导老师:潘金妹)

Ngoenzhaenx, ban dou youh miz boux lauxsae moq he daej lo, dwg Lij lauxsae.

Lij lauxsae baez byaij haeuj gyausiz, couh riunyumnyum doiq daengx ban doengzhag naeuz: “Gou singq Lij, ngoenzneix hainduq caeuq daihgya itheij hag yijvwnz, dwg boux mehmbwk……” Vah de caengz gangj

Lauxsae, Gou Loek Lo

老师，我错了

环江县思恩镇清潭小学六年级 罗华丹

sat, gyoengq doengzhag cungj “hu…… hu……” riu hwnjdaej, miz mbangj caegcaeg singsaeq lwnh: “Boux vunz cungj ndwn youq gizneix, byawz mbouj rox mwngz dwg mehmbwk. Caen duet vaq ok roet——doyawz.”

“Youh boux mehmbwk yakdoeg ndeu daej son raeuz, ai, caen boihseiz, mingh gou baenzlawz yienghneix haemz lai ne?” Gou nyaenx mbouj ndaej hix caeuq gyoengq doengzhag lwnh hwnjdaej.

“Danhdanh, cingj mwngz ndwn hwnjdaej, ganggangj ba, mwngz dwg baenzlawz duenhdingh naeuz gou boux

lauxsae mehmbwk neix yakdoeg ne? Gou gig siengj dingq mwngz ganggangj yienzaen, ndaej lwi?” Mbouj rox seizlawz, lauxsae gaeng byaij daengz henz daiz gou riu dwk naeuz. Gou simvueng dangqmaz, seizneix caen siengj ndonj haeuj cong h namh bae.

Gou menhmenh ndwn hwnjdaej, cijguen ngagem gyaiej yawj gwnz deihbanj, mbouj gamj ngiengx gyaiej yawj Lij lauxsae. Gizaed gou mbouj rox naj Lij lauxsae, cij dwg seizneix dingq daihgya lwnh couh luenh gangj hane. Gou nyinhnaeuz gaxgonq boux

lauxsae mehmbwk son dou haenx yakdoeg, ngoenzneix hix dwg lauxsae mehmbwk, wnggai lumj boux gaxgonq nei yak raixcaix. Gou sing baenzneix saeq, Lij lauxsae lij dingqny. Gou baenzlawz hoizdap lauxsae ne?

“Mbouj youqgaenj, gangj saed vah, lauxsae mbouj gvaq mwngz.” Lij lauxsae youh coi naeuz.

Gou ndwn gaemz heiq daengz laj daej dungx, najmong dwk saeqsing naeuz: “Gou cix dwg luenh gangj, lauxsae, gou loek lo, doiq mbouj hwnj, cingj yienzliengh gou.”

“Dahlwg ha, lauxsae mbouj dwg bouxsien, lauxsae hix miz gezdenj. Danhseih, mbouj caengz diucaz liujgaij couh duenhdingh, siujsim ‘bingh daj bak haeuj, hux daj bak ok’ ha!” Lauxsae unqswnd dwk naeuz.

Gangj sat le, Lij lauxsae cienq ndang byaij coh gyangdaiz bae, gou naengh youq gwnz daengq ndawsim nanzsauh raixcaix.

(指导老师:莫忆术)

